



Tulisan Bahasa Melayu

Parlimen Persekutuan Tanah Melayu telah memutuskan, pada 14 Disember 1959 yang lalu, bahawa tulisan bahasa kebangsaan (Melayu) ialah tulisan Latin yang lebih terkenal dengan nama tulisan Rumi, dan bersama-samanya diakui juga tulisan Melayu yang lebih terkenal dengan nama tulisan Jawi.

Keputusan itu diambil setelah meminda cadangan asal yang dikemukakan oleh pemimpin parti negara, Dato' Onn bin Jaafar, yang berbunyi:

“Tulisan rasmi bahasa kebangsaan negeri ini hendaklah tulisan Melayu yang lebih terkenal dengan nama tulisan Jawi, dan bersama-samanya diakui juga tulisan Latin yang lebih terkenal dengan nama tulisan Rumi.”

Dato' Onn tatkala mempertahankan tulisan Melayu, berkata: Meskipun saya sendiri suka Rumi, tetapi kita jangan lupa akan beratus-ratus ribu bangsa Melayu yang di kampung-kampung yang tidak tahu membaca Rumi dan tidak mahu belajar Rumi.

Sosialis Menentang Tulisan Melayu

Wakil Sosialis (Lim Kean Siew) dalam perbahasan itu telah menentang tulisan Melayu dirasmikan bersama-sama dengan tulisan Rumi, lalu dikemukakannya

satu pindaan yang menghendaki hanya tulisan Rumi sahaja, manakala tulisan Jawi “akan digunakan selagi mustahak.”

Pindaan pihak kerajaan – katanya lagi – yang menetapkan Rumi dan Jawi sama-sama menjadi tulisan rasmi bahasa kebangsaan adalah berlawanan dengan perlembagaan yang menetapkan hanya satu tulisan sahaja.

Timbalan Perdana Menteri, Tun Abdul Razak, telah menolak akan apa yang dikemukakan oleh wakil Sosialis *Front* itu dengan berkata, bahawa perlembagaan membolehkan kedua-dua tulisan – Jawi dan Rumi – menjadi tulisan bahasa kebangsaan.

Utamakanlah Tulisan Melayu

A. Zulkifli Muhamad¹ wakil Persatuan Islam Se-Tanah Melayu telah mempertahankan tulisan Melayu dan mendesak supaya parlimen menerima sahaja cadangan Dato' Onn yang mengutamakan tulisan Melayu dan dipakai juga tulisan Rumi, kerana yang demikian – katanya – tidak merosakkan usaha kerajaan hendak mengembangkan bahasa Melayu dengan tulisan Rumi dan penyatuan bahasa Melayu – Indonesia.

Tulisan Melayu Tidak Akan Hilang

Perdana Menteri Tengku Abdul Rahman, telah menyatakan bahawa kerajaan tidak sekali-kali bermiat hendak menghapuskan tulisan Melayu, kerana tulisan Melayu memang diakui sangat mustahak kepada bangsa Melayu. Tulisan Rumi juga amat mustahak dan kerana itu patut diutamakan untuk perkembangan bahasa Melayu yang dipakai oleh 100 juta manusia di seluruh Kepulauan Melayu.

Akhirnya..... Sosialis *Front* bersetuju dengan pindaan kerajaan.

¹ http://ms.wikipedia.org/wiki/Zulkifli_Muhammad